

漢魏六朝百三家集

梁

梁武帝

第六十二冊

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

V. 62

聚海新集

梁武帝集

梁武帝集題詞

梁武帝淨業賦序卽曹孟德之述志
令也孟德奸雄善文自許西伯梁帝
亦謬比湯武大言不怍夫長沙酷害
樊鄧興兵勢成騎虎延頸爲難獨無
道旣誅鼎新有三主忽焉狐盜覆齊宗

祀猶總師稱朕妄擬南巢白旗則石
勒胡人且笑曹馬矣帝負龍虎之相
兼文武之才史贊其恭儉莊敬藝能
博學人君罕有惜羯寇滔天臺城煨
燼制旨二百餘卷五禮一千餘卷通
史六百卷後世無繇誦讀今得其詔

令書敕諸篇置帝王集中則魏晉風
烈間有存者雕蟲小伎壯夫不爲尚
幸見之朝廷未容以河中之水東飛
伯勞數詩定帝高下也捨道歸佛躬
爲教宗顧白衣所急首唱斷肉耳據
帝自序絕魚肉斷房室欲天下知其

不貪其責賀散騎又云腰瘦二尺救
物故也神器至重逆取順守僅欲以
黃羸菜味自救不臣爲計短矣至今
愚夫愚婦身盜賊而口素食卽云銷
孽滅過率祖帝術也

婁東張溥題

梁武帝集目錄

賦

淨業賦

有序

孝思賦

有序

圍棋賦

賦體

詔

遣使巡省詔

遣使巡行州郡詔

求讜言詔

令公卿入陳時政詔

令百司各陳損益詔

令所在條陳民患詔

令所在條陳時政詔

令郡縣各陳時政闕失詔

命朝堂叅議疑事詔

命尚書郎奏事詔

設謫木肺石二函詔

風聞奏事詔

用賢詔

芻求俊乂詔

舊族搜士詔

勿限年次詔

定梁律詔

申勅諸州訊獄詔

慎刑詔

贖刑詔

除贖罪之科詔

更開贖刑詔

赦詔

赦詔

停老少連坐詔

停祖父連坐詔

汝潁建州詔

恤新附諸州詔

禁止私利詔

開山澤常禁詔

清公田詔

原宥散失官物詔

通用足陌錢詔

撫流移詔

埋枯骨詔

罷京觀詔

立晉安王爲皇太子詔

祠南郊恩詔五首

改作南北郊詔

耕籍田詔

豐年恩詔

幸蘭陵恩詔

推恩六親詔

停賀瑞詔

罷祈禱詔

建學詔

遣皇子及王侯子弟入學詔

弘經術詔二首

問羣臣音樂詔

罷鳳凰啣書詔

放遣後宮詔

禁止宮人縱觀郊祀詔

南面詔

議洗匱詔

守視晉宋齊諸陵詔

差等品流詔

郊廟等令視散騎詔

散騎通直詔

尚書五都詔

牙像詔

出古育王塔下佛舍利詔

代牲詔

薦蔬詔

手詔何點

徵何點爲侍中詔

徵庾詵庾承先詔

臧盾兼領軍詔

授江革臨川王長史詔

拜范述曾大中大夫詔

拜何遠給事黃門侍郎詔

與陳慶之手詔

以伏臘爲豫章內史詔

遣豫章王北伐詔

授武陵王揚州刺史詔

旌沈崇僚詔

旌甄恬詔

答徐勉修五禮詔

答陶弘景請解官詔

答陶弘景進冥通記詔

與任昉詔

答劉之遴詔

答周弘正詔

贈柳慶遠詔

贈王茂詔

追封蕭穎冑詔

贈范雲詔

贈袁昂詔

贈蔡道恭詔

贈張惠紹詔

贈鄭紹叔詔

贈馮道根詔

贈呂僧珍詔

贈昌義之詔

贈張弘策詔

追贈張弘籍詔

贈孔休源詔

贈蕭子顯詔

贈裴子野詔

贈顧協詔

贈周捨詔

又卹周捨詔

賻陸雲公手詔

贈亡仲孚詔

卹何黠詔

謚庾詵貞節處士詔

贈臨川王宏詔

贈南平王偉詔

贈鄱陽王恢詔

改封南昌公爲侯詔

齊世王侯降封詔

詔許慧詔

責蕭昱詔

責西豐侯正德詔

光宅寺金像詔

寬禁誌公詔

勅

手勅何胤

與何胤勅三首

勅昭明太子

勅報皇太子

答皇太子請御講勅

又

又

答晉安王請開講啟勅

答晉安王謝開講般若啟救

答菩提樹頌手勅

答晉安王謝幸善覺寺啟勅

勅貞陽侯淵明

樂府詩集 目錄
手勅劉之遴

賜陸倕勅

手勅張率

責賀琛勅

勅答臣下神滅論

勅光祿大夫江革

勅沈約撰佛記序

與周捨論斷肉勅

又

又

又

又

答曹思文勅

喻智藏勅

勅答釋明徹

勅答僧正南澗寺沙門慧超

手勅江革

卷二

制

與羣臣諭明堂制

又制

駁慈母服議制

唱斷肉經竟制

冊

謚始興王冊

璽書

賜左丞范縝璽書

令

霸府去苛令

霸府禁奢令

閱武堂大赦令

申飭刑政令

初封梁王下國中恩令

掩骼令

檄

移京邑檄

梁武帝集

目錄

十

表

申飭選人表

請徵補謝朓何胤表

書

喻袁昂手書

與蕭寶寅書

答蕭穎胄書

與何胤書

答陶弘景論書書一

答陶弘景論書書二

答陶弘景論書書三

答陶弘景論書書四

答陶隱居書

報侯景書

又

又

與始興王憺書

脚氣帖

曹鄧州帖

序

爲亮法師製涅槃經疏序

記

立神明成佛義記

輿駕東行記

連珠

連珠三首

賜到漑連珠一首

箴

凡百箴

銘

硯銘

文

卽位告天文

捨道歸佛文

金剛般若懺文

摩訶般若懺文

斷酒肉文四首

樂府

芳樹

有所思

臨高臺

雍臺

長安有狹邪行

擬青青河畔草

擬明月照高樓

閭闔篇

邯鄲歌

子夜歌二首

子夜四時歌

春歌四首

夏歌四首

秋歌四首

冬歌四首

歡聞歌二首

團扇歌

碧玉歌

上聲歌

襄陽白銅鞮歌三首

楊叛兒

白紵辭二首

河中之水歌

東飛伯勞歌

江南弄

七曲

江南弄

龍笛曲

採蓮曲

鳳笙曲

採菱曲

遊女曲

朝雲曲

上雲樂

鳳臺曲

桐柏曲

方丈曲

方諸曲

玉龜曲

金丹曲

金陵曲

詩

逸民

直石頭

答任殿中宗記室王中書別

宴詩

首夏泛天池

登北顧樓

天安寺疏圓堂

籍田

撰孔子正言竟述懷詩

遊仙

遊鍾山大愛敬寺

會三教

和太子懺悔

十喻五首

幻

如炎

靈空

乾闥婆

夢

代蘇屬國婦

古意二首

擣衣

織婦

戲作

七夕

紫蘭始萌

邊戍

詠舞

詠燭

詠筆

詠笛

答蕭琛

賜謝覽王暕詩

賜張率

戲題劉孺手板

覺意詩賜江革

送始安王方略入關

聯句

清暑殿効柏梁體

聯句詩

附錄

本紀

梁武帝集目錄終

梁武帝集

目錄

七

梁武帝御製集卷一

明 太倉張 溥閱

賦

淨業賦 有序

少愛山水，有懷邱壑。身羈俗羅，不獲遂志。舛獨
往之行，乖任縱之心。因爾登庸，以從王事。屬時
多故，世路屯蹇。有事戎旅，略無甯歲。上政昏虐，
下豎姦亂。君子道消，小人道長。御刀應勅，梅蟲

兒茹法珍俞靈韻豐勇之如是等多輩誌公所
謂亂戴頭者也。誌公者是沙門寶誌形服不定
示見無方于時羣小疑其神異乃羈之華林外
閣公亦怒而言曰亂戴頭亂戴頭各執權軸人
出號令威福自由生殺在口忠良被屠馘之害
功臣受無辜之誅服色齊同分頭各驅皆稱帝
主人主尊極用其詭詐疑亂衆心出入盤遊無
忘昏曉屏除京邑不脫日夜屬纊者絕氣道傍
子不遑哭臨月者行產路側母不及抱百姓慄

慄如崩厥角。長沙宣武王有大功於國。禮報無
報。酷害奄及。至於弟姪亦罹其禍。遂復遣桓神
與杜伯符等六七輕使。以至雍州。就諸軍帥欲
見謀害。衆心不與。故事無成。後遣劉山陽灼然
見取。壯士羆虎。器甲精銳。君親無校。便欲束身
待戮。此之橫暴。出自羣小。畏壓溺。三不弔。況復
姦豎乎。若默然就死。爲天下笑。俄而山陽至荆
州。爲蕭穎胄所執。卽遣馬驛傳道至雍州。乃赫
然大號。建牙豎旗。四方同心。如響應聲。以齊永

元二年正月發自襄陽。義勇如雲，舳艫翳漢。竟陵太守曹宗、馬軍主殷昌等，各領騎步夾岸迎候。波浪逆流，亦四十里。至朕所乘舫，乃止。有雙白魚跳入舫前。義等孟津事符冥應，雲動天行。雷震風馳，郢城尅定。江州降款，姑熟甲冑望風退散。新亭李居士稽首歸降。獨夫旣除，蒼生甦息。便欲歸志園林，任情草澤。下逼民心，上畏天命。事不獲已，遂膺大寶。如臨深淵，如履薄冰。猶欲避位，以俟能者。若其遜讓，必復魚潰。非直身

死名辱。亦負累幽顯。乃作賦曰。日夜常思。惟循環亦已窮。終之或得離離之。必不終負。屢臨朝。冕旒四海。昧旦乾乾。夕惕若厲。朽索御六馬。方此非譬。世論者以朕方之湯武。然朕不得以比湯武。湯武亦不得以比朕。湯武是聖人。朕是凡人。此不得以比湯武。但湯武君臣義未絕。而有南巢白旗之事。朕君臣義已絕。然後掃定獨夫。爲天下除患。以是二途。故不得相比。朕布衣之時。唯知禮義。不知信。向烹宰衆生。以接賓客。隨

物肉食不識菜味。及至南面富有天下遠方珍羞貢獻相繼海內異食莫不畢至。方丈滿前百味盈俎。乃方食輟飭。對案流泣。恨不得以及溫清朝夕供養。何心獨甘此膳。因爾蔬食不噉魚肉。雖自內行不使外知。至於禮宴羣臣餽膳按常菜食味習體過黃羸。朝中班班始有知者。謝朓孔彥穎等屢勸解素。乃是忠至未達朕心。朕又自念有天下本非宿志。杜恕有云剗心擲地數片肉耳。所賴明達君子亮其本心。誰知我不

貪天下唯當行人所不能行者。今天下有以知我心復斷房室不與嬪侍同屋而處四十餘年矣。於時四體小惡問上省師劉澄之。姚菩提疾候所以。劉澄之云。澄之知是飲食過所致。答劉澄之云。我是布衣甘肥恣口。劉澄之云。官昔日食那得及今日食。姚菩提含笑搖頭云。唯菩提知官房室過多。所以致爾。于時久不食魚肉亦斷房室。以其智非和緩術無扁華。默然不言。不復詰問。猶令爲治。劉澄之處酒。姚菩提處九服。

之病逾增甚以其無所知故不復服因爾有疾常自爲方不服醫藥亦四十餘年矣本非精進既不食衆生無復殺害障既不御內無復欲惡障除此二障意識稍明內外經書讀便解悟從是已來始知歸向禮云人生而靜天之性也感物而動性之欲也有動則心垢有靜則心淨外動既止內心亦明始自覺悟患累無所由生也乃作淨業賦云爾

觀人生之天性抱妙氣而清靜感外物以動欲

心攀緣而成青過恒發於外塵累必由於前境
若空谷之應聲似遊形之有影懷貪心而不厭
縱內意而自騁目隨色而變易眼逐貌而轉移
觀五色之玄黃翫七寶之陸離著華麗之窈窕
耽冶容之逶迤在寢興而不捨亦日夜而忘疲
如英媒之在摘若駿馬之帶羈類白日之麗天
乃歷年之不虧觀耳識之愛聲亦如飛鳥之歸
林旣流連於絲竹亦繁會於五音經昏明而不
絕歷四時而相尋或亂情而惑慮或惱耳而堙

心至如香氣醇起，觸鼻發識，婉婉追隨，氤氲無
極，蘭麝夾飛，如鳥二翼，若渴飲毒，如寒披棘，舌
之嗜味，衆塵無有，大苦鹹酸，莫不甘口，噉食衆
生，虐及飛走，唯日不足，長夜飲酒，悖亂明行，罔
慮幽咎，身之受觸，以自安怡，美目清揚，巧笑蛾
眉，細腰纖手，弱骨豐肌，附身芳潔，觸體如脂，狂
心迷惑，倒想自欺，至如意識，攀緣亂念，無邊靡
懷，善想皆起，惡筌如是，六塵同障，善道方紫，奪
朱如風靡草，抱惑而生，與之偕老，隨逐無明，莫

非煩惱，輪迴火宅，沈溺苦海，長夜執固，終不能
改，迤否相隨，災異互起，內懷邪信，外縱淫祀，排
虛枉命，蹠實橫死，妄生神祐，以招福祉，前輪折
軸，後車覆軌，殃國禍家，亡身絕祀，初不內訟，責
躬反己，皇天無親，唯與善人，外清眼境，內淨心
塵，不與不取，不愛不嗔，如玉有潤，如竹有筠，如
芙蓉之在池，若芳蘭之生春，淤泥不能汙其體，
重昏不能覆其真，霧露集而珠流，光風動而生
芬，爲善多而歲積，明行動而日新，常與德而相

隨恒與道而爲隣。見淨業之愛果。以不殺而爲
因。離欲惡而自脩。故無障於精神。患累已除。障
礙亦淨。如久澄水。如新磨鏡。外照多像。內見衆
病。旣除客塵。又還自性。三途長乖。八難永滅。止
善旣脩。行善無缺。清淨一道。無有異轍。唯有哲
人。乃能披神如石投水。莫逆於心。心清冷其若
水。志皎潔其如雪。在欲結其旣除。懷憂畏其亦
滅。與恩愛而長違。顧生死而永別。覽當今之逸
少。想後來之英童。懷荆玉而未剖。藏神器而存

躬脩聖行其不已信善積而無窮永劫揚其美
名萬代流於清風豈伏強而稱勇乃道勝而爲
雄

孝思賦

有序

想緣情生情緣想起物類相感故其然也每讀
孝子傳未嘗不終軸輟書悲恨拊心嗚咽年未
髫鬣內失所恃餘喘冷淠。孀媪相長齒過弱冠
外失所怙限職荆蠻致闕晨昏江途遼賈家無
指信髣髴行路先君體有不安晝則輟食夜則

廢寢方寸煩亂容身無所便投刺解職以遵歸路于時齊隋郡王子隆鎮撫陝西頻煩信命令停一夕明當早出江津送別心慮迫切不獲承命止得小船望星就路夜冒風浪不遑甯處途次定陵船又損壞于時門賓周仲連爲鵲頭戍主借得一舸奔波兼行屢經危險僅而獲濟及至戾止已無逮及五內屠裂肝心破碎便欲歸身山下畢志墳陵長兄哀愍未說獨行續有北問狡虜寇邊朝廷以先君遺愛結民咸思在昔

故舊部曲，猶有數千。武慶宗將領留防彼鎮，時
便有旨，使扞壽春。王事靡盬，辭不獲免。刺史崔
慧景，志懷翻覆，遠招逋逃，多聚姦俠，大猾凶醜，
莫不雲集。至如彭盆、韓元孫等，不可稱數。倍道
電邁，奄至淮淝，凶徒疑駭，相引離散。臺軍士徐
玄慶、房伯玉等，欲襲取慧景，乃固禁之，方得止
息。是歲，齊明作相，疑論未決，密馳表疏，勸徵慧
景，折簡而召。必不違拒。卽重遣還，以安其心。姦
渠旣出，緣邊無虞。旬朔之間，慧景反鎮，卽便解

甲以歸京師，因爾驅馳，不獲停息，數鍾百六時，會雲雷，撥亂反正，遂膺四海。念子路見於孔丘，曰：由事二親之時，常食藜藿之食，爲親負米百里之外；親沒之後，南遊於楚，從車百乘，積粟萬鍾，累茵而坐，列鼎而食，願食藜藿之食，爲親負米，不可復得。每感斯言，雖存若亡。父母之恩，云何可報？慈如河海，孝若涓塵。今日爲天下主，而不及供養，譬猶荒年而有七寶，饑不可食，寒不可衣，永慕長號，何解悲思？乃於鍾山下建大愛。

敬寺、於青溪側造大智度寺、以表罔極之情、達
追遠之心、不能遺蓼莪之哀、復於宮內起至敬
殿、竭工匠之巧、盡世俗之奇、水石周流、芳樹雜
沓、限以國事、亦復不能得朝夕侍食、唯有朔望
親奉饋奠、雖復得薦珍羞、而無所瞻仰、內心崩
潰、如焚如灼、情切於衷、事形於言、乃作孝思賦
云爾、

感四氣之變易、見萬物之化成、受天和而異命、
稟地德而齊榮、察蟪蛄於蚊睫、觀鯢鵬於北溟、

彼含識而異見、同有色而殊形、雖萬類之衆多、
獨在人而最靈、禮義別於飛走、言語異於鸚猩、
念過隙之儻忽、悲逝川之不停、踐霜露而悽愴、
懷燧穀而涕零、掩此哀而不去、亦靡日而弗思、
仲由念枯魚而永慕、邱吾感風樹而長悲、雖一
至而捨生、奉二親而何期、思因情生、情因思起、
導情源以流澍、引思心而無已、旣懷憂以終身、
亦銜恤而沒齒、當閒居以永念、獨拊膺而自傷、
徒升岵而靡瞻、空陟屺其何望、涕縱橫以交流、

血沸涌而沾裳、覽地義以自咎、懼滅性之乖方、
仰太極以長懷、乃告哀於昊蒼、冀皇天之有感、
何報施之茫茫、曉百碎於魏闕、夜萬斷於中腸、
心與心而相續、思與思而未央、晨孤立而縈結、
夕獨處而徊徨、氣塞哀其似噎、念積心其若狂、
至如獻歲發暉、春日載陽、木散百華、草列衆芳、
對樂時而無歡、乃觸目而感傷、朱明啟節、白日
朝臨、木低甘果、樹接清陰、不娛悅於懷抱、但罔
極而纏心、兼葭蒼蒼、白露爲霜、涼氣入衣、淒風

動裳心無迫而自切、情不觸而獨傷、若乃寒氷
已結、寒條已拆、林飛黃落、山積白雪、旅鴈鳴而
哀哀、朔風鼓而颼颼、目觸事而破碎、心隨感而
斷絕、無一息而緩念、與四時而長切、年揮忽而
莫反、時瞬睽其如電、想慈顏之在昔、哀不可而
重見、痛生育之靡咎、顧報復而無片、悲與恨其
俱興、涕雜血其如霰、鷦青春而差池、鴻素秋而
翱翔、去來侯於節物、飛鳴應於陰陽、何在我而
不爾、與二氣而乖張、常茹酷而輪迴、厯日夜而

不忌。旣視丹而成綠。亦見白而爲黃。擾性情以
翻覆。汨神慮而逃荒。想鳴鶴而魂斷。聽孤雛而
心死。慟終天而無怙。號畢世而靡恃。觀休屠之
日磧。豈教義之所及。見甘泉之畫像。每下拜而
垂泣。忽心動而不安。遽入侍於帝室。值何羅之
作難。乃捨之以投瑟。超王臣之稱首。冠誠勇而
無匹。士行已之多方。見石他之有權。身雖死而
名揚。乃忠孝而兩全。顧丁蘭其何人。家河內之
野王。時舞象而方及。始成童而親亡。刻木母以

供事。常朝夕而在傍。劉鎮就養而不暇。常遠汲而力寡。苦節感於幽靈。醴泉生於竈下。顧長沙之臨湘。有古初之道始。時父沒而未塋。遇隣火之卒起。乃伏棺而長號。雨暴至而火死。又何琦其亦然。獨樞屋而全止。至如王祥黃雀人帳。隗通橫石特起。盛彥之開母目。邢渠之生父齒。覽斯事而衆多。亦難得而具紀。靈蛇銜珠以酬德。慈烏反哺以報親。在蟲鳥其尚爾。况三才之令人。治本歸於三大。生民窮於五孝。置天地而德。

盈橫四海而不撓，履斯道而不行，吁！孔門其何教？

圍棋賦

圍奩象天，方局法地。枰則廣羊文犀，子則白瑤
立玉，方目無斜，直道不曲。爾乃建將軍，布將士，
列兩陣，驅雙軌，徘徊鶴翔，差池燕起。用忿兵而
不顧，亦馮河而必危。癡無成術而好鬪，非智者
之所爲。運疑心而猶豫，志無成而必虧。今一棋
之出手，思九事而爲防。敵謀斷而計屈，欲侵地

而無方、不失行、而致寇、不助彼、而爲強、不讓他、以增地、不失子、而云亡、落重圍、而計窮、欲佻巧而行促、劇疎勒之屯遘、甚白登之困辱。或龍化而超絕、或神變而獨悟、勿膠柱以調瑟、專守株而待兔、或有少綦、已有活形、失不爲悴、得不爲榮、若有苦戰、未必能平、用折雄威、致損令名、故城有所不攻、地有所不爭、東西馳走、左右周章、善有翻覆、多致敗亡、雖蓄銳以將取、必居謙以自牧、譬猛獸之將擊、亦俛耳而固伏、若局勢已

勝不宜過輕禍起於所忽功墜於垂成至如玉
壺銀臺車廂井欄旣見知於曩日亦在今之可
觀或非劫非持兩懸兩生局有衆勢多不可名
或方四聚五花六持七雖涉戲之近事亦臨局
而應悉或取結角或營邊鄙或先點而亡或先
撇而死故君子以之遊神先達以之安思盡有
戲之要道窮情理之奧秘

賦體

草迴風以照春木承雲以含化芳競飛於陽和

花爭開於日夜，樂萬類之得所，豈此心之云舍。
欣分竹其厲精，慙戎車之屢駕。

詔

遣使巡省詔

觀風省俗，哲后弘規，狩岳巡方，明王盛軌，所以
重華在上，五品聿脩，文命肇基，四載斯履，故能
物色幽微，耳目屠釣，致王業於緝熙，被淳風於
遐邇，朕以寡薄，昧於治方，藉代終之運，當符命
之重，取監前古，懍若馭朽，思所以振民育德，去
殺勝殘，解網更張，置之仁壽，而明慙照遠，智不
周物，兼以歲之不易，未遑卜征，興言久惕，無忘

鑒寐可分遣內侍周省四方觀政聽謠訪賢舉
滯其有田野不闢獄訟無章忘公徇私侵漁是
務者悉隨事以聞若懷寶逃邦蘊竒待價蓄響
藏真不求聞達並依名騰奏罔或遺隱使輶軒
所屆如朕親覽焉

遣使巡行州郡詔

昔哲王之宰世也每歲卜征躬事巡省民俗政
刑罔不必逮末代風凋久曠茲典雖欲肆遠忘
勞究臨幽仄而居今行古事未易從所以日晏

踟躕情同再撫，總總九州，遠近民庶，或川路幽
遐，或貧羸老疾，懷冤抱理，莫由自申，所以東海
匹婦致災，邦國西土，孤魂登樓，請訴，念此于懷，
中夜太息，可分將命，巡行州部，其有深冤鉅害，
抑鬱無歸，聽詣使者，依源自列，庶以矜隱之念，
昭被四方，邇聽遠聞，事均親覽。

求讜言詔

政在養民，德存被物，上令如風，民應如草，朕以
寡德，運屬時來，撥亂反正，倏焉三紀，不能使重

門不閉，守在海外，疆場多阻，車書未一，民疲轉輸，士勞邊防，徹田爲糧，未得頓止，治道不明，政用多僻，百辟無沃心之言，四聰闕飛耳之聽，州輟刺舉，郡忘共治，致使失理，負謗無由聞達，侮文弄法，因事生姦，肺石空陳，懸鐘徒設，書不云乎，股肱惟人，良臣惟聖，寔賴賢佐，匡其不及，凡厥在朝，各獻讜言，政治不便於民者，可悉陳之，若在四遠，刺史二千石長吏，並以奏聞，細民有言事者，咸爲申達，朕將親覽，以紓其過，又武在

位舉爾所知。公侯將相。隨才擢用。拾遺補闕。勿有所隱。

令公卿入陳時政詔

昔公卿面陳。載在前史。今僕陞奏。列代明文。所以釐彼庶績。成茲羣務。晉氏陵替。虛誕爲風。自此相因。其失彌遠。遂使武帳空勞。無汲公之奏。丹墀徒闕。闕鄭生之履。三槐八座。應有務之。百官宜有所論。可入陳啟。庶藉周爰。少匡寡薄。令百司各陳損益詔

朕達聽思治無忘日昃而百司羣務其途不一
隨時適用各有攸宜若非總會衆言無以備茲
親覽自今臺閣省府州郡鎮戍應有職僚之所
時共集議各陳損益具以奏聞

令所在條陳民患詔

皇王在昔澤風未遠故端居立扈拱默巖廊自
大道旣淪澆波斯逝動競日滋情僞彌作朕負
展君臨百年將半宵漏未分躬勞政事白日西
浮不遑飧飯退居猶於布素含咀匪過藜藿甯

以萬乘爲貴，四海爲富，唯欲億兆康甯，下民安
乂，雖復三思行事，而百慮多失，凡遠近分置，內
外條流，四方所立，屯傳邸治，市廛柵渡，津稅田
園，新舊守宰，遊軍戍邏，有不便於民者，尚書州
郡，各速條上，常隨言除省，以舒民患。

令所在條陳時政詔

觀時設教，王政所先，兼而利之，寔惟務本，移風
致治，咸由此作，頃因革之令，隨事必下，而張弛
之要，未臻厥宜，民瘼猶繁，廉平尚寡，所以竚旒

續而載懷朝玉帛而興歎可申下四方政有不
便於民者所在具條以聞守宰若清潔可稱或
侵漁爲蠹分別奏上將行黜陟長吏勸課躬履
堤防勿有不脩致妨農事關市之賦或有未允
外時參量優減舊格

令郡縣各陳時政闕失詔

朕四聰旣闕五識多蔽畫可外牒或致紕繆凡
是政事不便於民者州郡縣卽時皆言勿得欺
隱如使怨訟當境任失而今而後以爲永准

命朝堂叅議疑事詔

經國有體，必詢諸朝。所以尚書置令僕丞郎，旦旦上朝，以議時事。前共籌懷，然後奏聞。頃者不爾，每有疑事，倚立求決。古人有云：主非堯舜，何得發言？便是是故，放勛之聖，猶咨四岳；重華之叡，亦待多士。豈朕寡德，所能獨斷？自今尚書中有疑事，前於朝堂叅議，然後啟聞，不得習常。其軍機要切，前須諮審，自依舊典。

命尚書郎奏事詔

自禮闈陵替，歷茲永久，郎署備員，無取職事。糠粃文案，貴尚虛閑，空有趨墀之名，了無握鬬之實。曹郎可依昔奏事。

設謗木肺石二函詔

商俗南移，遺風尚熾，下不上達，由來遠矣。升中馭索，增其懍然，可於公車府謗木肺石傍，各置一函，若肉食莫言。山阿欲有橫議，投謗木函。若從我江漢，功在可策。犀兕徒弊，龍蛇方縣。次身才高妙，擯壓莫通。懷傅呂之術，抱屈賈之歎。其

理有皦然。受困包匭。夫大政侵小。豪門陵賤。四民已窮。九重莫達。若欲自申。並可投肺石函。

風聞奏事詔

成務弘風。肅厲內外。寔由設官分職。互相懲糾。而頃壹拘常式。見失方奏多容。違情莫肯執咎。憲綱日弛。漸以爲俗。今端右可以風聞奏事。依元熙舊制。

用賢詔

學以從政。殷勤往哲。祿在其中。抑亦前事。朕思

闡治綱、每敵儒術、軾間闢、館造次以之、故負褻
成風、甲科間出、方當置諸周行、飾以青紫、其有
能通一經、始末無倦者、策實之後、選可量加、敘
錄、雖復牛監羊肆、寒品後門、並隨才試、冀勿有
遺隔。

旁求俊乂詔

爲國在於多士、甯下寄于得人、朕暗於行事、尤
闕治道、孤立在上、如臨深谷、凡爾在朝、咸思匡
救、獻替可否、用相啟沃、班下方岳、傍求俊乂、窮

其屠釣書其巖穴以時奏聞

舊族搜士詔

在昔周漢、取士方國、頃代凋訛、幽仄罕被、人孤地絕、用隔聽覽、士操淪胥、因茲靡勸、豈其岳瀆縱靈、偏有厚薄、寔由知與不知、用與不用耳、朕以菲德、君此兆民、而兼明廣照、屈於堂戶、飛耳長目、不及四方、永言愧懷、無忘旦夕、凡諸郡國舊族、邦內無在朝位者、選官搜括、使郡有一人

勿限年次詔

今九流常選、年未三十、不通一經、不得解褐、若有才同甘、顏、勿限年次

定梁律詔

律令不一、寔難去弊、殺傷有法、昏墨有刑、此蓋常科、易爲條例、至如三男一妻、懸首造獄、事非慮內、法出恒鈞、前王之律、後主之令、因循創附、良各有以、若遊辭費句、無取於寔錄者、宜悉除之、求文指歸、可適變者、載一家爲本、用衆家以附、景丁俱有、則去丁以存景、若景丁二事、注釋

不同則二家兼載咸使百司議其可不取其可
安以爲標例宜云某等如千人同議以此爲長
則定以爲梁律留尚書比部悉使備文若班下
州郡止撮機要可無二門侮法之弊

申勅諸州訊獄詔

三訊五聽著自聖典哀矜折獄義重前誥蓋所
以明慎用刑深戒疑枉成功致治罔不由茲朕
自藩部常躬訊錄求理得情洪細必盡末運弛
綱斯政又闕牢犴沈壅申訴靡從朕屬當期運

卷一
三
君臨兆億。雖復齊居宣室。留心聽斷。而九牧遐
荒。無因臨覽。深懼懷寃就鞫。匪惟一方可申勅
諸州。月一臨訊。博詢擇善。務在確實。

慎刑詔

朕昧旦齊居。惟刑是恤。三辟五聽。寢興載懷。故
陳肺石於都街。增官司於詔獄。殷勤親覽。小大
以情。而明慎未洽。囹圄尚擁。永言納隍。在予興
愧。凡犴獄之所。可遣法官近侍。遞錄囚徒。如有
枉滯。以時奏聞。

贖刑詔

金作贖刑。有聞自昔。入縑以免。施於中代。民悅法行。莫尚乎此。永言叔世。偷薄成風。嬰讐入罪。厥塗匪一。斷弊之書。日纏於聽覽。鉗鈇之刑。歲積於牢狴。死者不可復生。生者無因自返。由此而望。滋實庸可致乎。朕夕惕思治。念崇政術。斟酌前王。擇其令典。有可以憲章邦國。罔不由之。庶愧心於四海。昭情素於萬物。俗僞日久。禁網彌繁。漢文四百。邈焉已遠。雖省事清心。無忘日

用而委衙廢策事未獲從可依周漢舊典有罪入贖外詳爲條格以時奏聞

除贖罪之科詔

設教因時淳薄異政刑以世革輕重殊風昔商俗未移民散久矣嬰網陷辟日夜相尋若悉加正法則赭衣塞路並申弘宥則難用爲國故使有罪入贖以全元元之命今遐邇知禁罔狎稍虛率斯以往庶幾刑措金作權典宜在蠲息可除贖罪之科

更開贖刑詔

堯舜以來便開贖刑。中年依古許罪身入貲。吏下因此不無姦猾。所以一日復勅禁斷。川流難殫。人心惟危。旣乖內典。慈悲之義。又傷外教。好生之德。書云與夫不辜甯失不經。可復開罪身皆聽入贖。

赦詔

民之多幸。國之不幸。恩澤屢加。彌長姦盜。朕亦知此之爲病矣。如不優赦。非仁人之心。凡厥誓

卷一百一十五
耗逋負起今七年十一月九日昧爽以前在民間無問多少言上尚書督所未入者皆赦除之

赦詔

大運肇升嘉慶惟始劫賊餘日沒在臺府者悉可蠲放諸流徒之家並聽還本

停老少連坐詔

夫刑法悼耄罪不收拏禮著明文史彰前事蓋所以申其哀矜故罰有弗及近代相因厥網彌峻髫年華髮同坐入讐雖懲惡勸善宜窮其制

而老幼流離良亦可愍自今逋謫之家及罪應質作若年有老少可停將送

停祖父連坐詔

禽獸知母而不知父無賴子弟過於禽獸。至於父母並皆不知多觸王憲致及老人耆年禁執大可傷愍自今有犯罪者父母祖父母勿坐唯大逆不預今恩

汝潁建州詔

二豫分置其來久矣今汝潁尅定可依前代故

事以懸瓠爲豫州、壽春爲南豫、改合肥爲合州、
北廣陵爲淮州、項城爲殷州、合州爲南合州、

恤新附諸州詔

今汝南新復、嵩頴載清、瞻言遺黎、有勞鑒寐、宜
覃寬惠、與之更始、應是緣邊、初附諸州、部內百
姓、先有負罪流亡、逃叛入北、一皆曠蕩、不問往
讐、并不得挾以私讐、而相報復、若有犯者、嚴加
裁問、

禁止私利詔

古人云一物失所。如納諸隍。未是切言也。朕寒
心消志。爲日久矣。每當食投箸。方眠撒枕。獨坐
懷憂。憤慨申口。非爲一人。萬姓故耳。州牧多非
良才。守宰獸而傳翼。楊阜是故憂憤。賈誼所以
流涕。至於民間誅求萬端。或供厨帳。或供廩庫。
或遣使命。或待賓客。皆無自費。取給於民。又復
多遣遊軍。稱爲遏防。姦盜不止。暴掠繁多。或求
供設。或責脚步。又行劫縱。更相枉逼。良人命盡。
富室財殫。此爲怨酷。非止一事。亦頻禁斷。猶自

未已。外司明加聽採。隨事舉奏。又復公私傳屯
邸治。爰至僧尼。當其地界。止應依限守視。乃至
廣加封固。越界分斷。水陸採捕。及以樵蘇。遂致
細民措手無所。凡自今有越界禁斷者。禁斷之
身。皆以軍法從事。若是公家創內。止不得輒自
立屯。與公競作。以收私利。至百姓樵採以供煙
爨者。悉不得禁。及以採捕。亦勿訶問。若不遵承
皆以死罪結正。

開山澤常禁詔

芻牧必往。姬文垂則。雉兔有刑。姜宣致貶。數澤山林。毓材是出。斧斤之用。比屋所資。而頃世相承。並加封固。豈所謂典民同利。惠茲黔首。凡公家諸屯戍。見封燠者。可悉開常禁。

清公田詔

用天之道。分地之利。蓋先聖之格訓也。凡是田桑廢宅。没入者。公創之外。悉以分給貧民。皆使量其所能。以受田分。如聞頃者。豪家富室。多占取公田。貴價僦稅。以與貧民。傷時害政。爲蠹已

甚自今公田悉不得假與豪家已假者特聽不追其若富室給貧民種糧共營作者不在禁例

原宥散失官物詔

朕思利兆民惟日不足氣象環回每弘優簡百官俸祿本有定數前代以來皆多評准頃者因循未遑改革自今以後可長給見錢依時卽出勿令逋緩凡散失官物不問多少並從原宥惟事涉軍儲取公私見物不在此例

通用足陌錢詔

朝四而暮三，衆徂皆喜，名寔未虧，而喜怒爲用，頃聞外間多用九陌錢，陌減則物貴，陌足則物賤，非物有貴賤，是心有顛倒。至於遠方，日更滋甚，豈直國有異政，乃至家有殊俗，徒亂王制，無益民財，自今可通用足陌錢，令書行後，百日爲期，若猶有犯男子謫，運女子質，作並同。

撫流移詔

夫樂所自生，含識之常性，厚下安宅，馭世之通規，朕矜此庶氓，無忘待旦，亟弘生聚之畧，每布

寬恤之恩、而編戶未滋、遷徙尚有、輕去故鄉、豈其本志、資業殆闕、自返莫由、巢南之心、亦何能弭。今開元發歲、品物惟新、思俾黔黎、各安舊所、將使郡無曠土、邑靡游民、雞犬相聞、桑柘交畛、凡天下之民、有流移他境、在天監十七年正月一日以前、可開恩半歲、悉聽還本、蠲課三年、其流寓過遠者、量加程日、若有不樂還者、即使著土籍爲民、准舊課輸、若流移之後、本鄉無復居宅者、村司三老、及餘親屬、卽爲詣縣告請、村內

官地官宅、令相容受、使戀本者還有所託。凡坐
爲市埭諸職、割盜衰滅、應被封籍者、其田宅車
牛、是民生之具、不得悉以沒入、皆優量分留、使
得自止、其商賈富室、亦不得頓相兼併、遁叛之
身、罪無輕重、並許首出、還復民伍、若有拘限、自
還本役、並爲條格、咸使知聞、

埋枯骨詔

掩骼埋骸。義重周經。樁櫨有加。事美漢策。朕向
隅載懷、每勤造次、收藏之命、亟下哀矜、而寓縣

遐深、遵奉未洽、號然路隅、往往而有言愍、沉枯
彌勞、傷惻可明、下遠近、各巡境界、若委骸不葬、
或蓀衣、莫改、卽就收斂、量給棺具、庶夜哭之魂、
斯慰、霜之骨有歸、

罷京觀詔

去歲胷山大殲醜類、宜爲京觀、用旌武功、但伐
罪弔民、皇王盛軌、掩骼埋骸、仁者用心、其下青
州、悉使收藏、

立晉安王爲皇太子詔

非至公無以王天下，非博愛無以臨四海。所以
堯舜克讓，惟德是與。文王舍伯邑考，而立武王。
格於上下，光被四表。今岱宗牢落，天步艱難。淳
風猶鬱，黎民未乂。自非克明克哲，允文允武，豈
能荷神器之重，嗣龍國之尊。晉安王綱，文義生
知，孝敬自然，威惠外宣。德行內敏，羣后歸美。率
土宅心，可立綱爲皇太子。庶百年勝殘，方流餘
慶。畢世後仁，永固洪業。

祠南郊恩詔

天行彌綸，覆燾之功博。乾道變化，資始之德成。
朕沐浴齋宮，虔恭上帝，祇事禋燎。高燦太一，大
禮克遂，感慶兼懷。思與億兆同其福惠，可大赦
天下。尤窮者無出，卽年租調。清議禁錮，並皆宥
釋。所計逋叛，巧籍隱年。閤丁匿口，開恩百日。各
令自首，不問往罪。流移他鄉，聽復宅業。蠲課五
年。孝悌力田，賜爵一級。居局治事，當勞二年。可
班下。遠近博採英異，或德茂州閭，道行鄉邑，或
獨行特立，不求聞達，咸使言上，以時招聘。

祠南郊恩詔

朕恭祇明祀，昭事上靈，臨竹宮而登泰壇，服裘冕而奉蒼璧，柴望旣升，誠敬克展，思所以對越乾元，弘宣德教，而缺於治道，政法多昧，實佇羣才，用康庶績，可班下遠，近博採英異，若有確然鄉黨，獨行州閭，肥遯邱園，不求聞達，藏器待時，未加收採，或賢良方正，孝悌力田，並卽騰奏，具以名上，當擢彼周行，試以邦邑，庶百司咸事，兆民無隱，又世輕世重，隨時約法，前以劓墨，用代

重辟猶念改悔其路已塞並可省除

祠南郊恩詔

朕當屢思治政道未明昧旦劬勞亟移星紀今
大皞御氣勾芒首節升中就陽禋敬克展務承
天休布茲和澤尤貧之家勿收今年三調其無
田業者所在量宜賦給若民存產子卽依格優
蠲孤老鰥寡不能自存咸加賑恤班下四方諸
州郡縣時理獄訟勿使冤滯並若親覽

祠南郊恩詔

春司御氣，虔恭報祀。陶匏克誠，蒼壁禮備。思隨
乾覆，布茲亭育。凡民有單老孤稚，不能自存，主
者郡縣，咸加收養，贍給衣食，每令周足，以終其
身。又於京師置孤獨園，孤幼有歸。華髮不匱。若
終年命，厚加料理。尤窮之家，勿收租賦。

祠南郊恩詔

奉時昭事，虔薦蒼璧。思承天德，惠此下民。凡因
事去土，流移他境者，並聽復宅業，蠲役五年。尤
貧之家，勿收三調。孝悌力田，賜爵一級。

改作南北郊詔

夫欽若昊天，曆象無違，躬執耒耜，盡力致敬，上
協星鳥，俯訓民時，平秩冬作，義不在南，前代因
襲，有乖禮制，可於震方，簡求沃野，具茲千畝，庶
允舊章。

耕籍田詔

夫耕籍之義大矣哉。粢盛由之而興，禮節因之
以著。古者哲王，咸用此作。卷言八政，致茲千畝。
公卿百辟，恪恭其儀。九推畢禮，馨香靡替。兼以

風雲叶律、氣象光華、屬覽休辰、思加獎勸、可班
下遠近、廣闢良疇、公私畎畝、務盡地利、若欲附
農、而糧種有乏、亦加貸卹、每使優遍、孝悌力田
賜爵一級、預耕之司、尅日勞酒。

豐年恩詔

今茲遠近、雨澤調適、其穫已及、冀必萬箱、宜使
百姓因斯安樂、凡天下罪無輕重、已發覺未發
覺、討捕未擒者、皆赦宥之、侵割耗散官物、無問
多少、亦悉原除、田者荒廢、水旱不作、無常時文

例應追稅者，并作田不登公格者，並停。各備臺州，以文最逋殿罪，悉從原。其有因饑逐食，離鄉去土，悉聽復業，蠲課五年。

幸蘭陵恩詔

朕自違桑梓，五十餘載，乃眷東顧，靡日不思。今四方款關，海外有截，獄訟稍簡，國務少閑，始獲展敬園陵，但增感慟。故鄉老少，接踵遠至，情貌孜孜，若歸於父。宜有以慰其此心，並可錫位一階，并加頒賚，所經縣邑，無出今年租賦，監所責

民蠲復二年，并普賚內外，從官軍主，左右錢米，各有差。

推恩六親詔

推恩六親，義彰九族，班以侯爵，亦曰惟允。凡是宗戚有服屬者，並可賜沐食鄉亭侯，各隨遠近，以爲差次，其有暱親，自依舊章。

停賀瑞詔

王公卿士，今拜表賀瑞，雖則百辟體國之誠，朕懷良有多愧。若其澤漏川泉，仁被動植，氣調玉

燭。治致太平。爰降嘉祥。可無慙德。而政道多缺。淳化未凝。何以仰叶辰和。遠臻冥貺。此乃更彰寡薄。重增其尤。自今可停賀瑞。

罷祈禱詔

夫有天下者。義非爲已。凶荒疾癘。兵革水火。有一於此。責歸元首。今祝史請禱。繼諸不善。以朕身當之。永使災害不及萬姓。俾茲下民。稍蒙甯息。不得爲朕祈福。以增其過。特班遠邇。咸令遵奉。

建學詔

建國君民，立教爲首。不學將落，嘉植靡由。朕肇基明命，光宅區宇。雖耕耘雅業，傷闡藝文。而成器未廣，志本猶闕。非所以鎔範貴遊，納諸軌度。思欲式啟齒讓，自家刑國。今聲訓所漸，戎夏同風。宜大啟庠敷，博延胄子。務彼十倫，弘此三德。使陶鈞遠被，微言載表。

遣皇子及王侯子弟入學詔

王子從學。著自禮經。貴遊咸在。寔惟前誥。所以

式廣義方。克隆教道。今成均大啟。元良齒讓。自斯以降。並宜隸業。皇太子及王侯之子。年在從師者。可令入學。

弘經術詔

二漢登賢。莫非經術。服膺雅道。名立行成。魏晉浮蕩。儒教淪歇。風節罔樹。抑此之由。朕日昃罷朝。思聞俊異。收士得人。寔惟疇獎。可置五經博士各一人。廣開館宇。招內後進。

又弘經術詔

建國君臣，在教爲首，砥身礪行，由乎經術。朕肇基明命，光宅區宇，雖耕耘雅業，仿闡藝文，而成器未廣，志本猶闕，非所以鎔範貴遊，納諸軌度。思欲式敦讓齒，自家刑國，今聲訓所漸，戎夏同風，宜大啟庠，敦博延胄子，務彼十倫，弘此三德，使陶鈞遠被，微言載表。

問羣臣音樂詔

夫聲音之道，與政通矣，所以移風易俗，明貴下賤，而韶濩之稱空傳，咸英之寔靡記。漢魏以來，

陵替滋甚，遂使雅鄭混淆，鐘石斯謬，天人缺九
變之節。朝宴失四懸之儀，歷年永久，將墮於地，
朕昧爽坐朝，思求厥旨，而舊章匪存，未獲釐正，
寤寐有懷，所爲歎息，卿學術通明，可陳所見，

罷鳳凰啣書詔

自宋齊以來有鳳凰
啣書伎至是罷之

朕君臨南面，道風蓋闕，嘉祥時至，爲媿已多，假
令巢侔軒閣，集同昌戶，猶當顧循寡德，推而不
居，況於名寔頓爽，自欺耳目，一日元會，太樂奏

鳳凰銜書伎至。乃舍人受書。升殿跪奏。誠復興
平前代。率由自遠。內省懷慙。彌與事篤。可罷之。

放遣後宮詔

宋氏以來。並恣滛侈。傾宮之富。遂盈數千。推算
五都。愁窮四海。並嬰罹冤橫。拘逼不一。撫絃命
管。良家不被。蠲織室。繡房幽厄。猶見役弊國。傷
和。莫斯爲甚。凡後宮樂府。西解暴室。諸如此例。
一皆放遣。若衰老不能自存。官給廩食。

禁止宮人縱觀郊祀詔

夫禋郊饗帝，至敬攸在，致誠盡懃，猶懼有違，而
往代多令宮人縱觀茲禮。幃宮廣設，輜輶耀路，
非所以仰虔蒼昊，昭感上靈。屬車之間，見譏前
世，便可自今停止。

南面詔

頃代以來，元日朝畢，次會羣臣，則移就壁下，東
向坐求之古義王者，讌萬國，唯應南面，何便居
東面。

議洗匱詔

祭祀用洗，匱中水盥，仍又滌爵，爵以禮神，宜窮精潔，而一器之內，雜用洗手外，可詳議。於是御應盥各用一匱。

守視晉宋齊諸陵詔

命世興王，嗣賢傳業，聲稱不朽，人代徂遷，二賔以位。三恪義在，時事浸遠，宿草榛蕪，望古興懷。言念愴然，晉宋齊三代諸陵，有職司者，勤加守護，勿令細民妄相侵毀，作兵有少，補使克足，前無守視，並可量給。

差等品流詔

禮闈文閣。宜率舊章。貴賤既位。各有差等。俯仰
拜伏。以明王度。濟濟洋洋。具瞻斯在。頃因多難。
治綱弛落。官非積及。榮由幸至。六軍尸四品之
職。青紫治白簿之勞。振衣朝伍。長揖卿相。趨步
廣闊。並驅丞郎。遂冠履倒錯。珪瓠莫辨。靜言疚
懷。思返流弊。且翫法情。官動成遁弛。罰以常科。
終未懲革。夫價楚申威。蓋代斷趾。管捶有令。如
或可從。外詳共平議。務盡厥理。

郊廟等令視散騎詔

南郊明堂陵廟等令與朝請同班於事爲輕可
改視散騎侍郎

散騎通直詔

在昔晉初仰惟盛化常侍侍中並奏帷幄員外
常侍特爲清顯陸始名公之肩位居納言曲蒙
優禮方有斯授可分門下二局委散騎常侍尚
書案奏分曹入集書通直常侍本爲顯爵員外
之選宜參舊准人數依正員格自是散騎視侍
中通直視中丞

員外視
黃門郎

尚書五都詔

尚書五都職參政要非但總領眾局亦乃方軌
二丞頃雖求才未臻妙簡可革用士流每盡時
彥庶同持領秉此羣曰。於是以前都令
史視奉朝請

牙像詔

天慈普覆義無不攝方便利物豈有方所上虞
縣民李屑之掘地得一牙像方減二寸兩邊雙
合俱成獸形其內一邊佛像一十二軀一邊一

十五軀、刻畫明淨、巧迹妙絕、將神靈所成、非人功也、中有真形、舍利六焉、東州昔經奏上、未以爲意、而屑之銜、愆繆繼東治、真形舍利降在中署、光明顯發、示希有相、大悲救苦、良有以乎、宜承佛力、弘茲寬大、凡天下罪無輕重、在今月十六日昧爽已前、皆赦除之、卽日散出、奉迎法身、還臺供養、

出古育王塔下佛舍利詔

太同四年八月月犯五車老人星見、改造長于寺、阿育王塔出佛舍利髮爪阿

育鐵輪王也。王閻浮一天下一日夜役鬼神造八萬四千塔。此其一焉。乘輿幸長干寺。設無礙法喜食。詔曰。

天地盈虛。與時消息。萬物不得齊其蠢生。二儀不得恒其覆載。故勞逸異年。懽慘殊日。去歲失稔。斗粟貴騰。民有困窮。遂臻斯濫。原情察咎。或有可矜。下車問罪。聞諸徃誥。責歸元首。寔在朕躬。若皆以法繩。則自新無路。書不云乎。與殺不辜。甯失不經。易曰。隨時之義大矣哉。今真形舍利。復現於世。逢希有之事。起難遭之想。今出阿

育王寺設無礙會耆年童齒莫不欣悅如積饑
得食如久別見親幽顯歸心遠近馳仰士女霞
布冠蓋雲集因時布德允叶人靈凡天下罪無
輕重皆赦除之

代牲詔

夫神無常饗饗于克誠所以西鄰禴祭寔受其
福宗廟祭祀猶有牲牢無益至誠有累冥道自
今四時蒸嘗外可量代八座議以大脯代一元
大武既停宰殺無復省
牲之事請立省
饌儀帝從之

薦蔬詔

今雖無復牲腥。猶有脯脩之類。卽之幽明。義爲未盡。可更詳定。悉薦時蔬。

叅議大餅代大脯餘悉用蔬菜

手詔何點

昔因多暇。得訪逸軌。坐脩竹。臨清池。忘今語古。何其樂也。甞別邱園。十有四載。人事艱阻。亦何可言。自應運在天。每思相見。密邇物色。勞甚山阿。嚴光排九重。踐九等。談天人。敘故舊。有所不臣。何傷於高。文先以皮弁謁子桓。伯况以穀綃

見文叔求之往策。不無前例。今賜卿鹿皮巾等後數日望能入也。

徵何點爲侍中詔

前徵士何點高尚其道。志安容膝。脫落形骸。栖志官寔。朕日吳思治。尚想前哲。况親得同時。而不與爲政。喉唇任切。必俟邦良。誠望惠然。屈居獻替。可徵爲侍中。

徵庾詵庾承先詔

明敷振滯。爲政所先。旌賢求士。夢佇斯急。新野

庾詵止足栖退、自事却掃經史文藝、多所貫習、
賴川庾承先學道黃老、詵涉釋教、並不競不營、
安茲枯槁、可以鎮躁散俗、詵可黃門侍郎承先
可中書侍郎、勒州縣時加散遣、庶能屈志、方冀
鹽梅、

臧盾兼領軍詔

總一六軍、非才勿授、御史中丞新除散騎常侍
盾志懷忠密識、用詳慎當官、平允處務、勤恪必
能緝斯戎政、可兼領軍常侍如故、

授江革臨川王長史詔

前貞威將軍鎮北長史廣陵太守江革才思通
贍出內有聞在朝正色臨危不撓首佐台鉉寔
允僉諧可太尉臨川王長史

拜范述曾大中大夫詔

中散大夫范述曾昔在齊世忠直奉主往莅永
嘉治身廉約宜加禮秩以厲清操可大中大夫
賜絹二十疋

拜何遠給事黃門侍郎詔

何遠前在武康已著廉平復莅二邦彌盡清白
政先治道惠留民愛雖古之良二千石無以過
也宜升內榮以顯外迹可給事黃門侍郎

與陳慶之手詔

慶之轉東宮直閣隸領軍伐魏渦陽據其城乘勝前頓城父高祖手詔嘉之

本非將種又非豪家舛望風雲以至於此可深
思竒畧善克令終開朱門而待賓揚聲名於竹
帛豈非大丈夫哉

以伏暉爲豫章內史詔

國子博士領長水校尉伏暉爲政廉平宜加將
養勿使志望致虧士鳳可豫章內史

遣豫章王北伐詔

廟謨已定王畧方舉侍中領軍將軍西昌侯深
藻可便親戎以前啟行鎮北將軍南充州刺史
豫章王綜董馭雄桀風馳次邁其餘衆軍計日
差遣初中後師善得嚴辨朕當六軍雲動龍舟
濟江

授武陵王揚州刺史詔

貞白儉素是其清也、臨財能讓是其廉也、知法不犯是其慎也、庶事無留是其勤也、

旌沈崇僚詔

前軍沈崇僚、少有志行、居喪踰禮、齋制不終、未得大塋、自以行乞淹年、哀典多闕、方欲以永慕之晨、更爲再葬之始、雖卽情可矜、禮有明斷、可便令除釋、擢補太子洗馬、旌彼門閭、敦茲風教、

旌甄恬詔

朕虛已欽賢、寤寐盈想、詔彼羣岳、務盡搜揚、恬

旣孝行殊異、聲著邦壤、散風厲俗、弘益茲多、收
守騰聞、義同親覽、可旌表室閭、

答徐勉脩五禮詔

勉表如此、因革允釐、憲章孔備、功成業定、於是
乎在、可以光被八表、施諸百代、俾萬世之下、知
斯文在斯、主者其按以遵行、勿有失墜、

答陶弘景請解官詔

卿遺累卻粒、尚想清虛、山中閑靜、得性所樂、當
善遂嘉志也、若有所須、便可以聞、仍賜帛十疋、

燭二十挺

答陶弘景進冥通記詔

省疏并見周氏遺跡真言顯然符驗前詔二三
明白益爲奇特四卷今留之見淵文并具一二
唯增讚歎

與任昉詔

聊爲七夕詩五韻殊不近詠歌卿雖訥於言而
辯於才可卽制付使者

答劉之遴詔

周易尚書禮記毛詩並有高祖義疏惟
左傳尚闕之遜著春秋大意十科左氏

十科三傳同意十科令
三十事上之高祖詔答

省所撰春秋義比事論書詞微旨遠編年之教
言闡義繁邱明傳洙泗之風公羊稟西河之學
鐸椒之解不迫瑕邱之說無取繼踵胡毋仲舒
云盛因脩穀梁千秋最篤張蒼之傳左氏賈誼
之襲荀卿源本分鑣指歸殊致詳畧紛然其來
舊矣昔在弱年乃經研味一從遺置迄將五紀
兼晚冬晷促機事罕暇夜分求衣未遑搜括須

待夏景。試取推尋。若溫故可求。別酬所問也。

答周弘正詔

設卦觀象。事遠文高。作繫表言辭。深理奧。東魯
絕編之思。西伯幽憂之作。事逾三古。人更七聖。
自商瞿稟承。子庸傳授。篇簡湮沒。歲月遼遠。田
生表菑川之譽。梁邱擅瑯琊之學。代郡范生。山
陽王氏。人藏荆山之寶。各盡立言之趣。說或去
取。意有詳畧。近縉紳之學。咸有稽疑。隨答所問。
已具別解。知與張譏等三百一十二人。須釋乾

坤文言及二繫萬機小暇試當討論

贈柳慶遠詔

念往篤終前王令則式隆寵數列代恒規使持
節都督雍梁南北秦四州郢州之竟陵司州之
隨郡諸軍事安北將軍甯蠻校尉雍州刺史雲
杜縣開國侯柳慶遠器識淹曠思懷通雅爰初
草昧預屬經綸遠自升平契濶禁旅重牧西藩
方弘治道奄至殞喪傷慟於懷宜追榮命以彰
茂勲可贈侍中中軍將軍開府儀同三司鼓吹

侯如故謚曰忠惠賻錢二十萬布二百匹

贈王茂詔

旌德紀勲哲王令軌念終追遠前典明誥故使
持節散騎常侍驃騎將軍開府儀同三司江州
刺史茂識度淹廣器宇凝正爰初草昧盡誠宣
力綢繆休戚契濶屯夷方賴謀猷永隆朝寄奄
至薨殞朕用慟於厥心宜增禮數式昭盛烈可
贈侍中太尉加班劍二十人鼓吹一部謚曰忠

烈

追封蕭穎胄詔

念功惟德，列代所同。追遠懷人，彌與事篤。齊故
侍中丞相尚書令穎胄，風格峻遠，器寓深邵，清
猷盛業，問望斯歸。締構義始，肇基王迹。契濶屯
夷，載形心事。朕膺大改，物光宅區。宇望岱觀，河
永言號，慟可封巴東郡開國公，食邑三千戶，本
官如故。

贈范雲詔

追遠興悼，常情所篤。况問望斯在，事深朝寄者。

乎。故散騎常侍尚書右僕射霄城侯雲器範貞
正，思懷經遠，爰初立志，素履有聞，脫巾來仕，清
績仍著，爰務登朝，具瞻惟允，綢繆翊贊，義簡朕
心，雖勤非負，勒而舊同，論講方騁，遠塗永毗，庶
政奄致，喪殞傷悼，于懷宜加，命秩式備，徽典可
追，贈侍中衛將軍僕射侯如故，并給鼓吹一部。

贈袁昂詔

侍中特進左光祿大夫司空昂奄至薨逝，惻怛
于懷，公器宇凝素，志誠貞方，端朝燮理，嘉猷載

緝追榮表德，寔惟令典。可贈本官鼓吹一部，給東園祕器朝服一具，衣一襲，錢二十萬，絹布一百疋，蠟二百斤，卽日舉哀。

贈蔡道恭詔

持節都督司州諸軍事平北將軍司州刺史漢壽縣開國伯道恭器幹詳審才志通烈王業肇構致力陝西受任邊垂効彰所蒞寇賊憑陵竭誠守禦奇謀間出捷書日至不幸抱疾奄至殞喪遺畧所固得移氣朔自非徇國忘已忠果並

至何能身沒守存窮而後屈言念傷悼特兼常懷追榮加等抑有恒數可贈鎮西將軍使持節都督刺史伯如故并尋購喪櫬隨宜資給

贈張惠紹詔

張惠紹志略開濟幹用貞果誠勲義始績聞累任爰居禁旅盡心朝夕奄至殞喪惻愴于懷宜追寵命以彰勲烈可贈護軍將軍給鼓吹一部布百疋蠟二百斤謚曰忠

贈鄭紹叔詔

追往念功、前王所篤、在誠惟舊、異代同規、通直
散騎常侍、右衛將軍、東興縣開國侯、紹叔立身
清正、奉上忠恪、契濶藩朝、情績顯著、爰及義始、
寔立茂勲、作牧疆境、効彰所蒞、方申任寄、協贊
心膂、奄至殞喪、傷痛於懷、宜加優典、隆茲寵命、
可贈散騎常侍、護軍將軍、給鼓吹一部、東園祕
器、朝服一具、衣一襲、凶事所須、隨由資給、謚曰
忠、

贈馮道根詔

豫甯縣開國伯新除散騎常侍領左軍將軍馮
道根奉上能忠有功不伐撫人留愛守邊難犯
祭遵馮異郭伋李牧不能過也奄致殞喪惻愴
干懷可贈信威將軍左衛將軍給鼓吹一部賻
錢十萬布百疋謚曰威

贈呂僧珍詔

思舊篤終前王令典追榮加等列代通規散騎
常侍領軍將軍平固縣開國侯僧珍器思淹通
識宇詳濟竭忠盡禮知無不爲與朕契濶情兼

屯泰大業初構茂勲克舉及居禁衛朝夕盡誠
方參任台槐式隆朝寄奄致喪逝傷慟於懷宜
加優典以隆寵命可贈驃騎將軍開府儀同三
司常侍鼓吹侯如故給東園祕器朝服一具衣
一襲喪事所須隨由備辦謚曰忠敬侯

贈昌義之詔

護國將軍營道縣開國侯昌義之幹畧沈濟志
懷寬隱誠著運始効彰邊服方申爪牙寄以禁
旅奄至殞喪惻愴于懷可贈散騎常侍車騎將

軍并鼓吹一部、給東園祕器朝服一具、賻錢二萬、布二百疋、蠟二百斤、謚曰烈、

贈張弘策詔

亡從舅衛尉慮發所忽、殞身祔豎、其情理清貞、器識淹濟、自藩升朝、契濶夷阻、加外氏凋衰、饗嘗屢絕、興感渭陽、情寄斯在、方賴忠勲、翼宣寡薄、報効無徵、永言增慟、可贈散騎常侍車騎將軍、給鼓吹一部、謚曰愍、

追贈張弘籍詔

亡舅齊鎮西參軍素風雅猷夙肩名輩降年不
永早世潛輝朕少離苦辛情地彌切雖宅相克
成輅車靡贈興言永往觸目慟心可追贈廷尉
卿

贈孔休源詔

慎終追遠歷代通規哀德疇庸先王令典宣惠
將軍金紫光祿大夫監揚州孔休源風業貞正
雅量冲邈升榮建禮譽重縉紳理務神州化覃
歌詠方興仁壽穆是彝倫奄然永逝倍用悲惻

樂正平集 卷一 三
可贈散騎常侍金紫光祿大夫，賻第一材一具，
布五十疋，錢五萬，蠟二百斤，尅日舉哀。喪事所
須，隨便資給。謚曰貞子。

贈蕭子顯詔

仁威將軍吳興太守子顯，神韻峻舉，宗中佳器。
分竹未久，奄到喪殞，惻愴于懷，可贈侍中、中書
令。今便舉哀。

贈裴子野詔

鴻臚卿領步兵校尉知著作郎兼中書通事舍

人裴子野文史足用廉白自居劬勞通事多歷
年所奄致喪逝惻愴空懷可贈散騎常侍賻錢
五萬布五十疋卽日舉哀謚曰貞子

贈顧協詔

員外散騎常侍鴻臚卿兼中書通事舍人顧協
廉潔自居白首不衰久在省闈內外稱善奄然
殞喪惻怛之懷不能已已傷無近親彌足哀者
大殮旣畢卽送其喪柩還鄉并營冢槨並皆資
給悉使周辦可贈散騎常侍令便舉哀謚曰溫

子

贈周捨詔

太子詹事豫州大中正捨奄至殞喪惻愴于懷
其學思堅明志行開敏劬勞機要多厯歲年才
用未窮彌可嗟勵宜隆追遠以旌善人可贈侍
中護軍將軍鼓吹一部給東園祕器朝服一具
衣一襲喪事隨由資給謚曰簡子

又卹周捨詔

故侍中護軍將軍簡子捨義該立儒博窮文史

奉親能孝、事君盡忠、厯掌機密、清貞自居、食不重味、身靡兼衣、終亡之日、內無妻妾、外無田宅、兩兒卑貧、有過古烈、往者南司白渦之効、恐外議謂朕有私、致此黜免、追愧若人一介之善、外可量加褒異、以旌善人、

賻陸雲公手詔

給事黃門侍郎掌著作陸雲公風尚優敏、後進之秀、奄然殂謝、良以惻然、可尅日舉哀、賻錢五萬布四十疋、

贈邱仲孚詔

豫章內史邱仲孚重試大邦責以後效非直悔
吝云亡實亦政績克舉不幸殞喪良以傷惻可
贈給事黃門侍郎

卹何點詔

新除侍中何點栖遲衡泌白首不渝奄至殞喪
倍懷傷惻可給第一品材一具賻財二萬布五
十疋喪事所須內監經理

謚庾詵貞節處士詔

旌善表行，前王所敦。新野庾詵，荆山珠玉。江陵
杞梓，靜侯南度。固有名德，獨貞苦節。孤芳素履，
奄隨運往。惻愴于懷，宜謚貞節。處士以顯高烈，

贈臨川王宏詔

侍中太尉臨川王宏，器宇冲貴，雅量弘通。爰初
弱齡，行彰素履。逮於應務，嘉猷載緝。自皇業啟
基，地惟介弟。久司神甸，厯位台階。論道登朝，物
無異議。朕友于之至，家國兼情。方弘燮贊，儀刑
列辟。天不憖遺，奄焉不永。哀痛抽切，震慟于厥。

心宜增峻禮秩式昭懋典可贈侍中大將軍揚
州牧假黃鉞王如故

贈南平王偉詔

旌德紀功前王令典慎終追遠列代通規故侍
中中書令大司馬南平王偉器宇宏曠鑒式弘
簡爰在弱齒清風載穆翼佐草昧勲高樊沔契
濶艱難劬勞任寄及賛務論道弘茲袞職奄焉
薨逝朕用震慟于厥心宜除寵命式昭茂典可
贈侍中太宰王如故

贈鄱陽王恢詔

故使持節散騎常侍都督荆湘雍梁益甯南北
秦八州諸軍事。驃騎大將軍開府儀同三司荆
州刺史鄱陽王恢風度開朗。器情凝質。爰在弱
歲。美譽克宣。洎於從政。嘉猷載緝。方入正論道。
弘燮台階。奄焉薨逝。朕用傷慟于厥心。宜隆寵
命。以申朝典。可贈侍中司徒王如故。

改封南昌公爲侯詔

庭堅世祀。靡輟於宗周。樂毅錫壤。乃昭於洪漢。

齊故太尉南昌公含章履道草昧興齊謨明翌
賛同符在昔雖子房之蔚爲帝師文若之隆比
王佐無以尚也朕膺曆受圖惟新寶命莘莘玉
帛升降有興永言前代敬惟徽烈匪直懋勳義
兼懷樹可降封南昌縣公爲侯食邑千戶

齊世王侯降封詔

興運升降前代舊章齊世王侯封爵悉皆降省
其有効著艱難者別有後命惟宋汝陰王不在
除例

詔許慧詔

大中大夫王敬胤卒。遺命不得設復魄。旌旒一廬。蔭籍下。一枚覆上。氣絕便沐浴。藍輿載尸還隧中。敬胤外甥許慧詔因阮研以聞。詔曰。

敬胤令其息崇素氣絕便沐浴。籍以二廬蔭。鑿地周身。歸葬忠侯。此達生之格言。賢夫玉匣石槨遠矣。然子于父命。亦有所從。有所不從。今崇素若信遺意。土周淺薄。屬辟不施。一朝見侵。狐鼠戮屍已甚。父可以訓子。子亦不可行之。外內易棺。此自奉親之情。籍土而葬。亦通人之意。宜

兩捨兩取。以達父子之志。棺周於身。土周于槨。去其牲。奠歛以時服。一可以申情。二可以稱家。禮敬無違。生死無辱。此故當爲安也。

責蕭昱詔

昱表如此。古者用人。必前明試。皆須績用。旣立。乃可自還之高。昔漢光武兄子章興二人。並有名宗室。就欲習吏事。不過章爲平陰令。興爲緱氏宰。政事有能。方遷郡守。非直政績見稱。卽是光武猶子。昱之才地。豈得比類焉。往歲處以淮

南郡旣不肯行、續用爲招遠將軍、鎮北長史、襄陽太守、又以邊外致辭、改除招遠將軍、永嘉太守、復云內地非願、復問晉安臨川、隨意所擇、亦復不行、解巾臨郡、事不爲薄、數有致辭、意欲何在、且昱諸兄遞居連率、相繼推轂、未嘗缺歲、其同產兄景今正居藩鎮、朕豈厚於景而薄於昱、正是朝序物議、次第若斯。於其一門、差自無愧、無諭今日不得如此、昱兄弟昔在布衣、以處成長、於何取立、豈得任情反道、背天違地、孰謂朝

廷、無有憲章、特是未欲致之於理、旣表解職、可
聽如啟、

責西豐侯正德詔

武帝初養正德爲子、及生昭明、正德還
本、心常快快、爲輕車將軍、奔魏、復逃歸
特復本封、普通六年、隨豫章王北侵、
棄軍委走、下獄、帝詔之、徙臨海郡、

汝以猶子、情兼常愛、故越先汝兄、剖符連郡、往
年在蜀、昵近小人、猶謂少年、情志未定、更於吳
郡殺戮無辜、劫盜財物、雅然無畏、及還京師、專
爲遁逃、乃至江乘要道、湖頭斷路、遂使京邑士

女早閉晏開。又奪人妻妾。畧人子女。徐敖非獨
失其配匹。乃橫屍道路。王伯敖列卿之女。誘爲
妾媵。我每加掩抑。冀汝自新。了無悛革。怨讐逾
甚。遂匹馬奔亡。志懷反噬。遣信慰問。冀汝能還。
果能來歸。遂我夙志。謂汝不好文史。志在武功。
令汝杖節董戎前驅。豈謂汝狠心不改。包藏禍
胎。志欲覆敗國計。以快汝心。今當宥汝以遠。無
令房累自隨。勅所在給汝稟餼。王新婦見理等
當停太尉間。汝餘房累悉許同行。

光宅寺金像詔

銅初不送、何緣乃爾、豈不以真相應感、獨表神奇乎、可鑄著花趺、以爲靈誌、

寬禁誌公詔

誌公迹拘塵垢、神遊冥寂、水火不能焦濡、蛇虎不能侵懼、語其佛理、則聲聞其上、談其隱淪、則遁仙高者、豈得以俗士常情、空相拘制、何其鄙狹、一至于此、自今行來、隨意出入、勿得復禁、

勅

手勅何屑

藝文載沈約爲高祖作，但旣係手勅，應非代言。

吾猥當期運，膺此樂推，而顧已蒙蔽，昧於治道。雖復劬勞日昃，思致隆平，而先王遺範，尚蘊方策。息舉之用，存乎其人。兼以世道澆暮，爭詐繁起，改俗遷風，良有未易。自非以儒雅弘朝，高尚軌物，則汨流所至，莫知其限。治人之與治身，獨善之與兼濟，得失去取，爲用孰多。吾雖不學，頗好博古，尚想高塵，每懷擊節。今世務紛亂，憂責

是當不得不屈道巖阿。共成世美。必望深達。往懷。不各濡足。今遣傾軍司馬王果宣旨諭意。遲面在近。

與何肩勅

高祖凡再勅肩於是遣何子朗等於東山受學肩以若邪迫隘不容生徒遷秦望山、

頃者學業淪廢。儒術將盡。閭閻縉紳。尠聞好事。吾每思弘獎其風。未移當辰。興言爲歎。本欲屈卿暫出。開導後生。旣屬廢業。此懷未遂。延伫之

勞載盈夢想。理舟虛席須俟來。秋所望惠然申
其宿抱耳。卿門徒中經明行脩。厥數有幾。且欲
瞻彼堂堂。寘此周行。便可具以名聞。副其勞望。

又

比歲學者殊爲寡少。良由無復聚徒。故明經斯
廢。每一念此。爲之慨然。卿居儒宗。兼以德素。當
勅後進。有意向者。就卿受業。想思深誨誘。使斯
文載興。

又

眉兄黠卒高
祖勅與眉

賢兄徵君。弱冠拂衣。華首一操。心遊物表。不滯
近跡。脫落形骸。寄之遠理。性情勝致。遇興彌高。
文會酒德。撫際逾遠。朕膺籙受圖。思長聲教。朝
多君子。既貴成雅俗。野有外臣。宜弘此難進。方
賴清徽。式隆大業。昔在布衣。情期早著。資以仲
虞之秩。待以子陵之禮。聽覽暇日。角巾引見。眷
然汾射。茲焉有託。一旦萬古。良懷震悼。卿友于
純至。親從凋亡。偕老之願。致使反奪。纏綿永恨。

伊何可任、永矣奈何、

勅昭明太子

太子性至孝、母喪、水漿不入口、每哭輒
慟絕、高祖遣顧協宣旨曰、毀不滅性、聖
人之制、禮不勝喪、比於不孝、有我在、那
得自毀如此、可卽強進飲食、雖屢奉勅
勸逼、日進一溢、
不嘗菜果之味、

聞汝所進過少、轉就羸瘵、我比更無餘病、正爲
汝如此、胸中亦圯塞成疾、故應強加饘粥、不使
我恒爾懸心、

勅報皇太子

武帝銳意儒雅，踈簡刑獄，姦吏招權，巧文弄法，簡文爲皇太子春宮視事，見而愍之，乃上疏，帝手勅報之，竟弗之從。

頃年以來，處處之役，惟資徒謫，逐急克配，若科置繁細，義同簡約，切須之處，終不可得，引例興訟，紛紜方始，防杜姦巧，自是爲難，更當別思，取其便也。

答皇太子請御講勅

省啟欲須吾講，具汝等意，書云一日二日，惟日萬機，今復過之，年耆根熟，氣力衰耗，荷此黼辰。

有踰重負日中或得一食或不得食周旦吐握未足爲勞楚君盱食方今非切未明求衣聿來弗休晝勞夜思精華已竭數術多事未獲垂拱兼國務靡寄豈得坐談須道行民安乃當議耳越勅

又

省重啟猶欲須吾講說具汝等所懷亦不異前答緣邇未入國度多乏如是等事恒須經計其餘繁碎非可具言率土未甯菜食者衆兼欸附

相繼賞與未周。怨望者多。懷音者少。漢世渾并。
賈誼亦且流慟。魏室無虞。楊阜猶云可悲。況今
爪牙腹心不貳之臣。又論道帷幄之士。四聰不
開。八達路擁。王侯雖多。維城靡寄。晝厲夕惕。如
履霜刃。以朽索馭六馬。豈是爲喻。詩不云乎。知
我者謂我心憂。不知我者謂我何求。方今信非
談日。汝等必欲爾者。自可令諸僧於重雲中講
道義也。越勅。

又

省汝等啟復具所懷。汝等未達稼穡之艱難，安知天下負重庸主少君。所以繼踵顛覆，皆由安不思危。況復未安者耶。殷鑒不遠，在於前代。吾今所行，雖異曩日，但知講說，不憂國事，則與彼人異術同亡。易言其亡繫于苞桑，斯則乾乾夕惕，僅而後免。汝等思之，一二具如前勅。越勅。

答晉安王請開講啟勅

省啟具汝所懷。法事既善，豈不欣然。吾內外衆緣憂勞紛總，食息無暇，廢事論道，是所未遑。汝

便爲未體國也，越勅

答晉安王謝開講般若啟勅

省啟具之爲汝講金字般若波羅密經，發題始
竟，四衆雲合，華夷畢集，連雨累日，深慮廢事，景
物開明，幽顯同慶，寔相之中，本無去來，身雖不
到，心靡不在，善自調養，慎勿牽勞，尚有兩旬，日
數猶奢，今雖不同，後會未晚也，吾始還臺，不復
多勅，越勅。

答菩提樹頌手勅

省啟覽所上菩提樹頌，据採致佳，辭味清淨，仰讚法王稱歎道樹意思，口說乃至手書，極得三業之善。但所言國美，皆非事寔，不無綺語過也。越勅。

答晉安王謝幸善覺寺啟勅

汝所營建慈悲寶剎，諸佛威神，不營多功，纔欲運力，即便豎立，幽顯欣仰，我亦隨喜，不得與汝同共瞻拜，此以爲恨耳。越勅。

勅貞陽侯淵明

武帝既納侯景大舉北侵以淵明都督
諸軍趣彭城淵明師次呂梁作寒山堰
以灌彭城水及于堞魏
遣將赴救兵敗被執

侯景志清鄴洛以雪讐耻其先率大軍隨機撫
定汝等衆軍可止於寒山築堰引清水以灌彭
城大水一沈孤城自殄慎勿妄動

手勅劉之遴

之遴領步兵校尉出爲郢州行事意不
願出固辭高祖手勅遂爲有司奏免

朕聞妻子具孝衰於親爵祿具忠衰於君卿既
內足理忘奉公之節

賜陸倕勅

太子中舍人陸倕所製石闕銘辭義典雅足爲佳作。昔虞邱辨物。邯鄲獻賦。賞以金帛。前史美談。可賜絹三十疋。

手勅張率

率爲司徒謝朓掾直文德待詔省奏待詔賦高祖手勅答之

省賦殊佳。相如工而不斂。枚臯速而不工。卿可謂兼二子於金馬矣。

責賀琛勅

琛遷散騎常侍，是時皆緣飾姦諂，深害時政。琛遂啟陳事條封奏，高祖大怒，召主書口授勅責琛，琛但謝過，不敢復有指斥。

謇謇有聞，殊稱所期。但朕有天下四十餘年，公車讜言，見聞聽覽，所陳之事，與卿不異。常欲承用，無替懷抱，每苦倥偬，更增惛惑。卿珥貂紆組，博問洽聞，不宜同於闔葦。止取名字，宣之行路。言我能上事，明言得失，恨朝廷之不能用。或誦離騷，蕩蕩其無人，遂不御乎千里。或誦老子知我者希，則我貴矣。如是獻替，莫不能言。正旦獻

罇○皆○其○人○也○卿○可○分○別○言○事○啟○乃○心○沃○朕○心○卿
云○今○北○邊○稽○服○政○是○生○聚○教○訓○之○時○而○民○失○安
居○牧○守○之○過○朕○無○則○哲○之○知○觸○向○多○弊○四○聰○不
開○四○明○不○達○內○省○責○躬○無○處○逃○咎○堯○爲○聖○主○四
凶○在○朝○况○乎○朕○也○能○無○惡○人○但○大○澤○之○中○有○龍
有○蛇○縱○不○盡○善○不○容○皆○惡○卿○可○分○明○顯○出○某○刺
史○橫○暴○某○太○守○貪○殘○某○官○長○凶○虐○尚○書○蘭○臺○主
書○舍○人○某○人○姦○猾○某○人○取○與○明○言○其○事○得○以○黜
陟○向○令○舜○但○聽○公○車○上○書○四○凶○終○自○不○知○堯○亦

永爲闇主。卿又云東境戶口空虛。良由使命繁多。但未知此是何使。卿云鴛困邑宰。則拱手聽其漁獵。桀黠長吏。又因之而爲貪殘。並何姓名。廉平掣肘。復是何人。朝廷思賢。有如饑渴。廉平掣肘。寔爲異事。宜速條聞。當更擢用。凡所遣使。多由民訟。或復軍糧。諸所颺急。蓋不獲已而遣之。若不遣使。天下枉直。一何綜理。事寔云何。濟辦。惡人日滋。善人日蔽。欲求安卧。其可得乎。不遣使而得事理。此乃佳事。無足而行。無翼而飛。

能到在所。不威而伏。豈不幸甚。卿旣言之。應有
深見。宜陳秘術。不可懷寶迷邦。卿又云。守宰貪
殘。皆由滋味過度。貪殘糜費。已如前答。漢文雖
愛露臺之產。鄧通之錢。布於天下。以此而治。朕
無愧焉。若以下民飲食過差。亦復不然。天監之
初。思之已甚。其勤力營產。則無不富饒。惰游緩
事。則家業貧窶。勤修產業。以營盤案。自己營之。
自己食之。何損於天下。無賴子弟。惰營產業。致
於貧窶。無可施設。此何益於天下。且又意雖曰

同富。富有不同。慳而富者。終不能設。奢而富者。於事何損。若使朝廷緩其刑。此事終不可斷。若急其制。則曲屋密房之中。云何可知。若家家搜檢。其細已甚。欲使吏不呼門。其可得乎。更相恐脅。以求財帛。足長禍萌。無益治道。若以此指朝廷。我無此事。昔之牲牢。久不宰殺。朝中會同。菜蔬而已。意粗得奢約之節。若復減此。必有蟋蟀之譏。若以爲功德事者。皆是園中之所產。育功德之事。亦無多費。變一瓜爲數十種。食一菜爲

數十味。不變瓜菜，亦無多種，以變故多，何損於事，亦毫芥不關國家。如得財如法而用，此不愧乎人。我自除公宴，不食國家之食，多歷年稔，乃至宮人亦不食國家之食，積累歲月，凡所營造，不關材官及以國匠，皆資僱借以成其事。近之得財，頗有方便；民得其利，國得其利。我得其利，營諸功德。或以卿之心，度我之心，故不能得知。所得財用暴於天下，不得曲辭辯論。卿又云：女妓越濫，此有司之責。雖然，亦有不同。貴者多畜

妓樂。至於勲附若兩掖。亦復不聞家有二八。多
畜女妓者。此並宜具言其人。當令有司振其霜
豪。卿又云。乃追恨所取爲少。如復傳翼。增其搏
噬。一何悖哉。勇怯不同。貪廉各用。勇者可使進
取。怯者可使守城。貪者可使捍禦。廉者可使牧
民。向使叔齊守於西河。豈能濟事。吳起育民。必
無成功。若使吳起而不重用。則西河之功廢。今
之文武。亦復如此。取其搏噬之用。不能得不重
更任彼。亦非爲朝廷爲之傳翼。卿以朝廷爲悖。

乃自甘之。當思致悖所以。卿云宜導之以節儉。又云至治者必以淳素爲先。此言大善。夫子言其身正不令而行。其身不正雖令不從。朕絕房室三十餘年。無有滯佚。朕頗自計。不與女人同屋而寢。亦三十餘年。至於居處。不過一床之地。雕飾之物。不入於宮。此亦人所共知。受生不飲酒。受生不好音聲。所以朝中曲宴。未嘗奏樂。此羣賢之所觀見。朕三更出理事。隨事多少。事少或中前得竟。或事多至日晏方得就食。日常一

食。若晝若夜時疾苦之。日或亦再食。昔腰腹過於十圍。今之瘦削。裁二尺餘。舊帶猶存。非爲妄說。爲誰爲之救物故也。書曰股肱惟人。良臣惟聖。向使朕有股肱。可得中主。今乃不免居九品之下。不令而行。徒虛言耳。卿今慊言。便罔知所答。卿又云。百司莫不奏事。詭競求進。此又是誰。何者。復是詭事。今不使外人呈事。於義可否。無人廢職。職可廢乎。職廢則人亂。人亂則國安乎。以因廢食。此之謂也。若斷呈事。誰尸其任。事委

之人云何可得。是故古人云。專聽生姦。獨任成亂。猶二世之委趙高。元后之付王莽。呼鹿爲馬。卒有閭閻樂望夷之禍。王莽亦終移漢鼎。卿云吹毛求疵。復是何人所吹之疵。擘肌分理。復是何人乎。事及深刻繩逐。並復是誰。又云治署邸肆。何者宜除。何者宜省。國容戎備。何者宜省。何者未須。四方屯傳。何者無益。何者妨民。何處興造。而是役民何處費財。而是非急。若爲討召。若爲徵賦。朝廷從來無有此事。靜息之方。復何者宜。

各出具事。其以奏聞。卿云若不及於時。大息其
民事。至方圖。知無及也。如卿此言。卽時便是大
役。其民是何處所。卿云國弊民疲。誠如卿言。終
須出其事。不得空作漫語。夫能言之。必能行之。
富國彊兵之術。急民省殺之宜。號令遠近之法。
並宜具列。若不具列。則是欺罔朝廷。空示頽舌。
凡人有爲先。須內省。惟無瑕者。可以戮人。卿不
得歷詆內外。而不極言其事。佇聞重奏。當後省
覽。付之尚書。班下海內。庶亂羊永除。害馬長息。

惟新之美復見今日

勅答臣下神滅論

位現致論要當有體欲談無佛應設賓主標其宗旨辨其短長來就佛理以屈佛理則有佛之義既躋神滅之論自行豈有不求他意妄作異端運其隔心鼓其騰口虛畫瘡痂空致詆訶篤時之蟲驚疑於往來滯斃之鼃河漢於遠大其故何也淪蒙忘而爭一息抱孤陋而守井幹豈知天地之長久溟海之壯濶孟軻有云人之所

知不如人之所不知信哉觀三聖設教皆云不
滅其文浩博難可具載止舉二事試以爲言祭
義云惟孝子爲能饗親禮運云三日齊必見所
祭若謂饗非所饗見非所見違經背親言語可
息神滅之論朕所未詳

勅光祿大夫江蒨

蒨子經幼有孝性父患眼經夢一僧云
飲慧眼水必差及覺莫能解者草堂寺
智者法師曰無量壽經云慧眼見真能
渡彼岸蒨乃啟捨同夏縣界牛屯里舍
爲寺乞賜嘉名勅答云云及就創造泄
文牛牛水青刻衣妻反水先艮及紫藥

遂差時人
謂之孝感

純臣孝子，徃徃感應。晉世顏含，遂見冥中送藥。近見智者知卿弟二息感夢云：慧眼水，慧眼則是五眼之一號。若欲造寺，可以慧眼爲名。

勅沈約撰佛記序

去歲令虞闡等撰佛記，并令作序。序體不稱，頻治改，猶未盡致。尋佛教因三假以寄法，藉二諦以明理，達相求宗，不著會道，論其旨歸，似未至極。乃不應以此相煩，亦是一途善事，可得爲厝。

筆不以故指勅闡等結序末體又似小異

與周捨論斷肉勅

法寵所言慚愧而食衆生此是經中所明羅刹
婦女云我念汝我食汝法寵此心卽是經之羅
刹

又

僧辯所道自死肉若如此說鴟鴞鳩鴿觸處不
死那不見有一自死者麋鹿雉兔充滿野澤亦
不曾見有一自死者而覓死肉其就屠殺家覓

死魚必就罾網處。若非殺生豈有死肉。經言買肉與自殺。此罪一等。我本不自爲正。爲諸僧尼作離苦因緣。

又

衆生所以不可殺生。凡一衆生具八萬戶蟲。經亦說有八十億萬戶蟲。若斷一衆生命。卽是斷八萬戶蟲命。自死衆生。又不可食者。前所附蟲雖已滅謝。後所附蟲其數復衆。若煮若炙。此斷附蟲皆無復命。利舌端少味。害無量衆生。其中

小者、非肉眼能觀、其中大者、灼然共見、滅慈悲心、增長惡毒、此實非沙門釋子所可應行、

又

衆僧食肉罪。劇白衣。白衣食肉、乃不免地獄、而止是一罪、至於衆僧食肉、旣犯性罪、又傷戒律、以此爲言、有兩重罪、若是學問衆僧食肉者、此爲惡業、復倍於前、所以如此、旣親達經教、爲人講說、口稱慈悲、心懷毒害、非是不知、知而故犯、言行旣違、卽成詭妄、論學問人食肉、則罪有三、

重所以貴於解義正爲如說修行反復噉食魚肉侵酷生類作惡知識起衆怨對墜墮地獄疾於攢矛善惡報應必也不亡凡出家人實宜深思、

又

聲聞受律儀戒本制身口七支一受之後乃至睡眠悶等律儀恒生念念得未曾有律儀所以爾者睡眠等非起惡心故不損不失乃至常生若起欲殺心於聲聞法雖不失身口戒而於戒

有損非唯損不殺戒亦兼汙餘戒至於手挾齒
齧動身口業則失身口戒爾時律儀無作卽斷
不續旣失不殺戒亦損汙餘戒所以爾者旃陀
羅人爲屠肉時爲何等人殺正爲食肉者若食
肉者卽有殺分於不殺戒卽成有缺若謂於善
律儀受殺生分於不殺戒無所缺者是不善律
儀人持八戒齋是惡律儀猶應相續若惡律儀
人持八戒齋惡律儀不復相續者是知善律儀
人受諸殺分是不殺戒卽時便缺別解脫戒不

復解脫、惡律儀人、無論持八戒齋、但起一念善心、惡律儀卽斷、若一念不斷、多念亦應不斷、若多念斷、是知一念時斷、善律儀人、其事亦爾、無論受諸殺分、有少殺分、不殺律儀、卽時亦斷、菩薩人持心戒、故自無有食衆生理、若缺聲聞、戒終不免地獄等苦、

答曹思文勅

具一二續旣背經以起義、乖理以致談、滅聖難以聖責、乖理難以理詰、如此則言語之論、略成

可息。

喻智藏勅

求空自閒、依空入慧、高蹈養神、寔是勝樂、不違
三乘、亦以隨喜、惟別之際、能無恨然、岐路贈言、
古人所重、猶勸法師行無礙心、大悲爲首、方便
利益、隨時用舍、不宜頓杜、以隔礙心、行菩薩道、
無有是處、

勅答釋明徹

徹受學僧祐隨出陽都住建初寺、天監

疾將卒奉表告
辭武帝答之

省疏增其憂、耿入誰不病、何以遽終、過甚法師
至性堅明、道行純備、往來淨土、去留安養、方除
四魔、理無五畏、惟應正念諸佛、不捨大願、與般
若相應、直至種智、發菩提心、彼我相攝、方結來
緣、敬如所及、菩薩行業、非千百年善思至理、勿
起亂想、覽筆悽懣、不復多云、


勅答僧正南澗寺沙門慧超

齊隆寺法鏡殂歿、慧超
啟釋法寵鎮之、勅曰

法寵法師造次舉動、不逾律儀、不挾性欲、不事
形勢、慈仁愷悌、雅有君子之風、匡政寺廟、信得
其人矣、

手勅江革

世間果報、不可不信、豈得底突、如對元延明邪、



梁武帝集卷一終